

- भारत रा सशस्त्र बल पाकिस्तान अर वां रा कब्जा वाळा जम्मू-कश्मीर मांय आतंकवादियां रा नौ ठिकाणा नेस्तनाबूद कीनां
- रक्षामंत्री राजनाथ सिंह फौज री सराहवणा कीनी- पहलगाम आतंकी हमला री जवाबी कार्यवाही **ऑपरेशन सिंदूर** ने संतुलित अर संयमित बतायीं
- मुख्यमंत्री भजनलाल शर्मा प्रदेशभर मांय हिफाजती इंतजामात चाक-चौबंद राखण अर सरहदी हलकां मांय खास निगराणी रा हुकम दीनां
- देश री हिफाजत ऊं जुड़ी तैयारियां मजबूत करण सारू देशभर रा नागरिक सुरक्षा जिलां मांय मॉकड्रिल-प्रदेश मांय ई अभ्यासं
- देश रा केई हवाई अड्डां ऊं उड़ानां टाळी ज्यी- केई घरेलू उड़ानां 10 मई ताई रद्द
- प्रदेश मांय पश्चिमी विक्षोभ रो असर बरकरार-कठे-कठे तेज बायरो बाजण सारू हल्की बरसातं

000

भारत रा सशस्त्र बल बीती रात **ऑपरेशन सिंदूर** चला र पाकिस्तान मांय अर पाकिस्तान रा कब्जा वाळा जम्मू-कश्मीर मांय नौ आतंकी ठिकाणा नेस्तनाबूद कर दीनां ओ ऑपरेशन करीब 25 मिनट ताई चाल्यो रक्षा मंत्री राजनाथ सिंह फौज री सराहवणा करता थकां कह्यो के वे लक्ष्य माथे सटीक निशाणो लगायो अर पूरो ध्यान राख र कार्यवाही कीनीं

.....

राष्ट्रीय सुरक्षा सलाहकार-एनएसए अजीत डोभाल ई पाकिस्तान मांय अर वां रा कब्जा वाळा जम्मू-कश्मीर मांय आतंकी ढांचां माथे कार्यवाही रा तुरत पाछे केई देशां रा राष्ट्रीय सुरक्षा सलाहकारां सागे बात कर र कार्रवाई री जाणकारी दीनीं वे बतायो के भारत रो इरादो तणा-तणी बधावण रो नी है, पण पाकिस्तान री हर कार्रवाई रो भारत करडो जवाब देवण सारू पूरी तरह तैयार हैं

नई दिल्ली मांय फौज, वायु सेना अर विदेश मंत्रालय कानी ऊं राख्यी ज्यी प्रेस वार्ता मांय कर्नल सोफिया कुरैशी अर विंग कमांडर व्योमिका सिंह बतायो के पहलगाम आतंकी हमला री जवाबी कार्रवाई रा तौर ऊं आ कार्यवाही करीजीं

.....

विदेश सचिव विक्रम मिसरी कह्यो के पहलगाम आतंकी हमला री जांच मांय पाकिस्तान रा आतंकियां सागे रिश्तां री ठा पड़ी हैं

.....

प्रधानमंत्री नरेंद्र मोदी राष्ट्रपति द्रौपदी मुर्मू सागे मुलाकात कीनीं राष्ट्रपति सोशल मीडिया पोस्ट रे जरिये कह्यो के मीटिंग रे दौरान प्रधानमंत्री वां ने ई कार्यवाही रा बारा मांय जाणकारी दीनीं

केंद्रीय गृह मंत्री अमित शाह ई आज दोपहर राजस्थान समेत पाकिस्तान ऊं लागती सरहद रा 9 राज्यां रा मुख्यमंत्रियां, मुख्य सचिवां अर पुलिस महानिदेशकां सागे मीटिंग कर र ज़रूरी विचार कीनों

पाकिस्तान रा आतंकी ठिकाणां माथे कार्यवाही पाछे राज्यपाल हरिभाऊ बागडे फौज री वीरता ने नमन कीनो हैं वे कह्यो के सेना सटीक, सतर्क अर संयमित कार्यवाही कीनीं पाकिस्तान मांय आतंकी ठिकाणा माथे एयर स्ट्राइक पाछे न्यारी-न्यारी सियासी पार्टियां रा नेता फौज री सराहवणा कीनीं प्रदेश कांग्रेस अध्यक्ष गोविंद सिंह डोटासरा ईं कार्रवाई ने **“आतंक रा खिलाफ़ निर्णायक कदम”** अर देश रा एका री मिसाल बतायीं

.....

रक्षा विशेषज्ञ कर्नल राजेश भूकर बतायो के ई ऑपरेशन ऊं पाकिस्तान ने भारत मांय आतंकवादी वारदातां बंद करण रो संदेश दियो ज्यो हैं

.....

फौज रा ऑपरेशन सिंदूर ने ध्यान राखता थकां प्रदेश मांय ई सावचेती राखण री राय दीरीजी हैं बीकानेर, जोधपुर अर किशनगढ़ हवाई अड्डां ऊं उड़ानां फिलहाल टाळ दीरीजी हैं जयपुर हवाई अड्डा ऊं ई आज संवारे कुछ उड़ानां रद्द कर दीरीजीं राज्य रा चार सरहदी जिलां श्रीगंगानगर, बाड़मेर, जैसलमेर अर बीकानेर मांय सरकारी अर गैर-सरकारी स्कूलां सारू आज छुट्टी रो ऐलाण कर दियो ज्यों आं जिलां मांय तय इम्तिहान ई टाळ दिया ज्यां ई बीचे सरकारी कर्मचारियां री छुट्टियां रद्द कर दीरीजी है अर वां ने मुख्यालय नी छोड़बा री हिदायत दीरीजी हैं ऑपरेशन सिंदूर ने ध्यान राखता थकां केई देशी उड़ानां रद्द कर दीरीजी हैं एयर इंडिया रे मुजब जम्मू, श्रीनगर, लेह, जोधपुर, अमृतसर, भुज, जामनगर, चंडीगढ़ अर राजकोट आवण-जावण वाळी उड़ानां 10 मई ताई रद्द कर दीरीजी हैं

000

देश रा हिफाजती इन्तजामात मजबूत करण री निजर ऊं आज पूरा देश रा 244 नागरिक सुरक्षा जिलां मांय मॉकड्रिल करी जा रही हैं पहलगाम आतंकी हमला पाछे गृह मंत्रालय मोटा पैमाना माथे रेहवासियां री हिफाजत ऊं जुड़ी मॉकड्रिल करण रो फैसलो कीनो हों इण रो मकसद किण ई आतंकी हमला रा हालात रो सामो करण जनता ने तैयार करणो हैं प्रदेश मांय ई राजधानी जयपुर समेत 28 शहरां मांय ओ अभ्यास कर्यो जा रह्यो हैं ई रा तैत सायरन बजा र लोगां ने चेतायी ज्यां

आज रात ब्लैक आउट ई कर्यो जावेलां ई दौरान लाइटां अर बिजली ऊं चालण वाळा साज-ओ-सामान बंद राखण री राय दीरीजी हैं ई सागे खिड़कियां अर दरवाजा ई बंद राखण री सलाह दीरीजी हैं रेडियो, मोबाइल फोन अर दूजा ज़रियां ऊं प्रसारित कर्या जावण वाळा सरकारी निर्देश सुण अर वां री पालना करण बाबत् ई कही ज्यो हैं प्रदेश रा न्यारा-न्यारा जिलां मांय व्हे रह्या ई अभ्यास मांय पुलिस, चिकित्सा अर स्वास्थ्य विभाग, स्काउट गाइड अर दूजा खुद सेवक संगठनां रा सदस्य शिरकत कर रह्या हैं जयपुर रा जिला कलेक्टर डॉ. जितेन्द्र कुमार सोनी सगळां ऊंदेश सारू एकजुट व्हे र कर्तव्य निभावण री अपील कीनीं

.....

ई बीचे मुख्यमंत्री भजनलाल शर्मा आज जयपुर मांय आला दर्जा री मीटिंग लीनीं वे सरहदी हलकां मांय खास निगराणी राखण रा हुकम दीनां श्री शर्मा पाकिस्तान मांय आंतकी ठिकाणां माथे करीजी कार्यवाही ने ध्यान राखता थकां प्रदेश मांय ई हिफाजती इन्तजामात चाक चौबंद राखण बाबत् कह्यो मुख्यमंत्री अहलकारां ऊं केन्द्रीय एजेंसियां सागे तालमेल कर र आपदा प्रबंधन अर नागरिक सुरक्षा सारू सगळा ज़रूरी जतन करण सारू ई कह्यो मुख्य सचिव सुधांश पंत जनता ऊं सावचेत रेहवण अर अफवाहां माथे ध्यान नी देवण री अपील कीनी हैं

000

देश मांय अंतरिक्ष रो हलको स्टार्टअप, कारोबारियां अर नौजवानां सारू काम करण बाबत् खोल दियो ज्यो हैं प्रधानमंत्री नरेन्द्र मोदी अंतरिक्ष अन्वेषण रा बारा मांय वैश्विक सम्मेलन सारू दिया ज्या वीडियो संदेश मांय आ जाणकारी दीनीं वे कह्यो के देश रो पहलो मानव अंतरिक्ष उड़ान मिशन गगनयान, बधती उम्मीदां ने उजागर करे हैं प्रधानमंत्री कह्यो के आवता हफतां मांय भारत रो एक अंतरिक्ष यात्री **इसरो-नासा** रा भेळा मिशन रा हिस्सा रा तौर ऊं अंतरिक्ष मांय जावेलां वे कह्यो साल 2035 ताई भारत रो अंतरिक्ष टेशन अनुसंधान अर वैश्विक सहयोग मांय नुवा मोर्चा खोलेलां

000

प्रदेश मांय पश्चिमी विक्षोभ रा असर ऊं आज कठे-कठे हल्की बारिश व्ही अर केई ठोडां बादळा मंड्या रेहवण सागे तेज़ बायरो बाज्यों पाली अर उदयपुर मांय बादळां री गाज सागे हल्की बरसात व्हीं मौसम विभाग आज उदयपुर अर कोटा संभाग मांय आंधी-बारिश अर कठे-कठे भारी बरसात व्हेवण रा आसार जताया हैं महकमा रे मुजब तीन-चार दिन ताई राज्य रा लंकाऊ, ऊगणी अर आतूणी हलकां मांय बिरखा व्हेवण रा आसार हैं

000

कोटा ज़िला रा रामगंज मंडी हलका मांय दिल्ली-मुंबई एक्सप्रेस-वे माथे आज एक कार रे बेकाबू व्हे र बिजली रा खम्भा ऊं टकरावण रे कारण चार जणां री मौत व्हे गयीं रामगंज मंडी रा थाना अधिकारी बतायो के मरण वाळां एक ही पिरवार रा हा अर दादरा नगर हवेली ऊं मध्यप्रदेश मांय ग्वालियर जा रह्या हां

000

प्रदेश मांय सी.आई.डी. अपराध शाखा रा 195 अहलकारां अर कर्मचारियां ने काल जयपुर मांय ईनाम दे र नवाज़ा जावेलां ई मौके अहलकारां अर कर्मचारियां ने मुख्यमंत्री सराहनीय सेवा पदक, राजस्थान पुलिस सेवा पदक, उत्कृष्ट अर अति उत्कृष्ट सेवा पदक अर उत्तम, अति उत्तम अर सर्वोत्तम सेवा चिन्ह दिया जावेलां

000